

【分牛籬蜂<sup>1</sup>叨著】李政墩原作

佢分牛籬蜂叨著哩！

奈日朝晨，去山肚巡田水、做田事，無看著路脣个竹園項有大蜂竇，又無細義去撞著該支竹仔，佢兜就走來尋佢輸贏。惡豺豺仔个蜂仔黏時就飛在吾四圍挨挨轉，對等吾圓身黏一路來。佢掙忒一隻看知係牛籬蜂就驚到煞煞走，一片退、一片掙圓身同頭那毛頂頂个蜂仔。退到無蜂仔个所在，正感覺著頭那昂昂、人怪怪，遽遽行轉屋下奈一下來。

無幾久吾頭那殼、圓身、手髀同脅下開始腫起來會痛：頭那殼感覺就像雲飄在天頂，又分人絢等：浮浮、胖胖膨膨合纏纏，試著頭那昂昂、無法度思考。左巴掌嫫膨到像發板樣仔，手痺痺、手指尾會伸毋會勾；坐毋核、睡毋得，唉唉唧唧正經艱苦。若係有陰間，該時个佢應該係戴在裡肚。

落尾分人送去病院掛急診，講有十過隻个蜂仔叨著佢了後，醫生當認真對佢講：一般來講，分牛籬蜂叨有二十針以上就可能冇生命危險，這種个蜂仔無解毒个血清、忒傷重有時節會引起過

敏性休克抑係溶血个症頭，盡好愛先通知若屋下人。醫生安排吊大笏射<sup>2</sup>、注射同抽血，吩咐佢先在醫院歇一暗晡，若係有麼个毋鬆爽愛黏時講。

等佢略略仔眠一下，感覺好當多就想愛轉。毋過醫生愛佢歇加一下正看啊，盡好愛等屙出來个尿色有正常，若係變做深深个泥色就較麻煩愛送去大醫院。愛過等，等無麼个问题正做得出院。包尾，都無問題咧，醫生還係吩咐講：「開个藥仔，愛照三餐食；係有哪位毋鬆爽，就愛趕緊過來哦！」

轉屋下換衫褲正知，佢總共分蜂仔叨著十六針，兩隻手髀發炎、腫腫，有罅癢个。左手巴掌還係紅腫無感覺、頭那暈暈想愛睡。睡到半夜緊爪，癢到人硬硬想愛同皮掀起來，想愛爪到骨頭去。食藥仔、膏藥仔無麼个效，堵好有人紹介講臺灣有一種牛樟菇做得強肝解毒，無定著對蜂毒有效。食也，該暗晡，真神奇就好睡、毋會癢。

這下，分蜂仔叨个所在既經結痂也，看等這兜爛疤仔又加一擺分佢惱起：該時節、該兜蜂仔，佢一儕人在山肚，有幾危險也！

<sup>1</sup> 牛籬蜂：音 ngiu<sup>ˇ</sup> lo<sup>ˇ</sup> pung<sup>ˊ</sup>；虎頭蜂。也說「油籬蜂」。

<sup>2</sup> 吊大笏射：音 diau tai gong<sup>ˇ</sup> sa；吊點滴。